


# U MPŌNJŌLI UNKULUMBA

## KANGI UGWĀMĀKA

 Mugonile kanunu, kwa umwe. U “Nsangalufu Pāsa” fiyo kuli aligwesa gwa umwe! Ili lyo limo mwa masiku amakulumba ukukīnda gosa, mu kikūmbusyo kya busyūke bwa Ntwa gwītu. Ilyēne lyo limo mwa makalumba ukukīnda gosa mu syāmbukūlu sya kīsu syōsya. Ubwēne bo busyūke. Kangi uswe tuli basangalufu fiyo ukuya apa, ulubunju ulu, pa lisiku ilikulumba ili. Kangi ukukēta ilisuba likupānda, kangi amaluba gikusōka ukufuma pa kīsu, kilikyōsa kikuyoba isya Pāsa.

Kangi lilino unko uswe twīnamīsyē imitu gyītu itolo pakabalilo kamokene.

<sup>2</sup> Tāta Kyāla, mu Kuyapo Kwako uswe tukwīsa. Kangi uswe tukugūlila Ugwe ukutupa kwa uswe, ulubunju ulu, itolo akasayo akanini akākongelelāpo ukufuma ku Mwānya, ukupalamasya kumo ukunini ukwa Pāsa myoyo gyītu gyēne; ukuti, akabalilo kāko uswe tukusōkāpo apa, uswe tubagile ukuyoba, bo bala bafumilāga ku Emmausi, “Ngimba indumbula syītu sikāpīle nkati mmyītu, panongwa ya Kuyapo Kwāke?” Kabuno, uswe tukusuma ikyēne mu Ngamu Yāke, kangi ku lwīmiko Lwāke. Amenī.

<sup>3</sup> Kula mwa buku gwa bumalikisyo, untu gwa 28 gwa Nongwainunu ya Mwikemo Mātai, ilinandi lya 7, Une ngulonda ukubala ukuya tusimbo twa kimanyisyo, mumo uswe tukubuka mu lukomano ulu.

*Kangi būka mbibimbibi, kangi kababūle abafūndīgwa bāke ukuti umwēne asyūkīle ukufuma ku bafwe; kangi, kēta, umwēne ikubūka pankyēni pa umwe ukubūka mu Galilai; kula umwe mwisakumbona umwēne: kētēsya, Une mbabūlīle umwe.*

<sup>4</sup> Butalulile bwālipō ubutumigwe bwīngi ubukulumba bupīgwe ku mūndu na bāndu ba kīsu iki. Lōli nasiku kwāliko uluko lwa butumīgwe bwakulōndīgwa lupīgwe bo ulu, “Būka kababūle abafūndīgwa Bāke ukuti Umwēne asyūkīle ukufuma ku bafwe.” Ubo bo butumīgwe bukulumba. Kangi injila yēne iki kyābagile ukupīgwa, yāli yo nongwa yakuti kwābagile ukuyako ukupōnjōla ukukulumba, ikyākwānda.

<sup>5</sup> Bālipō abanyāmbala mmasiku gītu, kangi mmasiku aga gakīndīle, kangi mu syāmbukūlu ingulumba isya kīsu iki, mu fyāke ifikulumba, ifipapate imigūnda gya bwīte; batalile bālīko abapōnjoli abakulumba bīngi, ifindu ifikulumba fīngi ifi fibōmbīgwe ku luko lwa būndu.

<sup>6</sup> Ukwēgeléla itolo, une ngwīnogonéla, bo une ngwīsa kuno ulubunju ulu, ngwēnda kuno ndābīle, kangī ngāli nu lusako ukufūnda fiyo mma. Panongwa yakuti, une ngāménye itolo kyo kiyabo kiliku, ikilo iki kyākīndága, uswe tubagīle ukuya nakyo umwīsyúgu, pakati pa ntimi na une, mu ngomano. Lōli pa nsebwe gwāngu ngwīsa, une nabonike ngwīnogóna kiliku, ulubunju ulu, kikuyaga kinunupo ukukīnda iki une mmenye ukuyoba ku bāndu Bāke, ukwēga i ndumi. Une ndinkwinogona isya iki, “Būka kababūle abafundigwa Bāke.” Lilino, *abafūndigwa* Bāke bo Bāke “abakōngésya.” U *mfūndigwa* yo “yumo uyu ikukōngésya.” Kangi une ndinkwinogona isya kimanyisyo iki, U *Mpōnjōli Unkulumba Kangi Ugwāmāka*.

<sup>7</sup> Kangi ngwīnogóna isya balinga abapōnjōli abakulumba uswe tutalile tuli nabo nkīsu iki, kangī fyo fīndu ifikulumba fiki abēne babōmbīle ukukīndilisya nukunosya injila ya būndu ubwa kwitūgasila. Une nīnogonāga isya nkulumba Napoleon, kunyuma mmasiku gāke, mūmo umwēne akāli katikati gwa kiFrench, lōli āli nakyo ikindukimo mu līnogóno lyāke. Ikyākwānda, umwēne—umwēne āhelulāga France, umwēne akākiganīle ikyēne. Umwēne āfumīle ku fisūngo. Lōli umwēne āli ni fūndo mu līnogóno lyāke, ukuti, ilisiku limo ukuti umwēne isakupōnjōla. Kangī i nongwa iyi umwēne āli na ifi mu līnogóno lyāke, umwēne āfīmibilisigwāga ukuya nakyo ikindukimo ikyākubōmbapo.

<sup>8</sup> Ku mūndu aligwēsa, bo ugwe ukāli ukabōmba akabōmbo, ugwe ubagīle ukuya nu kubīngilīla kumo, injila iyīngi yimo, ikindukimo iki ugwe kubōmbelāpo, pa nongwa ya kubōmbelāpo, ikindu kimo ikyakubōmbelāmo.

<sup>9</sup> Kangi mūmo uswe twēsa tukumanyila, ukwisila mu kwēga isyambukulu sya Hitler...pamo, komma isya Hitler, lōli isya—isyā Napoleon, ukuti umwēne endelāga umwēsi, kangī nukwāndūka kwa ndōndwa. Umwēne ābōmbelāga injila yila, nukugūlīla; panongwa yakuti akabalilo kamo umwēne ābōmbile lūlo, kangī umwēne ākabile ubupōnjōli. Kangi umwe ikwīsa kula mu France, kangī umwēne alinkuya gwābwīte nkulumba. Umwēne ābīkīle abanyāmbāla bīngi ku bufwe, panongwa yakuti abēne baktikīsaniāga nu mwēne. Kangi umwēne āpyāgīle ikīsu kyāke kyōsa, isya kalikōsa aka katātikanāga nu mwēne. Umwēne itolo lōsa āpuputīle ikyēne mōsa, panongwa yakuti umwe āfīmibilisigwāga ukuya nakyo ikyēne injila yila. Linga umwēne akāli nakyo ikyēne injila yila, pala pābagīle ukuyapo ikindukimo ukulwāna nu mwēne akabalilo kōsa, nu lubātīko ulukulumba ulu umwēne āli nalo mu līnogóno lyāke. Ubumi bwāke mwēne angali buli pa bupalapala, popāpo umwēne āfīmibilisigwāga ukuya nakyo ikitāngalāla kyāke kyōsa itolo nubupelelesye mūmo umwēne ābagīle ukukifikīsa ikyēne.

<sup>10</sup> Une ngwīnogóna lilino pakuti umwe mukungōnga une mu iki, isya Mpōnjōli unkulumba uyu une ngwīnogona. Kilikyosa

mu Kitangala Kyake kikufimbilisigwa ukuya kuli Umwene. Ikyene kiyege ndumbula, moyo, kangi mu mbili, kya Umwene. Pala kingayangapo nakimo ukulwana nu Mwēne. Kalikōsa aka kātātikanāga nu Mwēne, Umwēne ikufimbilisigwāga ukukatāga akēne. Umwēne abagile ukuya na kilikyosa ku Mwene. Kangi akabalilo kako. . .

<sup>11</sup> Napoleon, umwēne alinkwēga ifilwilo, imisīnga, indusu, indusu-ndali, inyibo. Kangi umwēne alinkubūka panja ni līnogōno limolyēne ili, ukuti umwēne isakupōnjōla i kīsu. Kangi umwēne naloli ābōmbīle kila, pa bukusi bwa malongo-matatu-na-fitatu. Akabalilo kāko umwēne āli nnyāmbāla nkeke, umwēne āli ntuli gwa bēngabwāwa. Kangi ubufumuke bwāke ubukulumba bwālītēndīke umwēne ukuya gwakyāke-mwēne; kangi ikyēne kilinkufika pa ndepa syāke, mpaka umwēne āfwīle pa bukusi bwa malongo-matatu-na-fitatu, kinwēlwa. Ubufumuke bwāke, umwēne alinkutoligwa ukwīma. kangi une ngwīnogōna isya nnyāmbāla, uyu pa iki, pa bukusi bwa malongo-matatu-na-fitatu, āpōnjwīle ikīsu nukufwa kinwēlwa, panongwa ya bufumuke bwāke, nukutāga si fūndo silasila isi umwēne ālwīlāga. Umwēne āli yo—umwēne āli yo luko lwa luko, pamo, komma u luko, une mbagile ukuyoba, lōli umwēne āli kyōmbo kya mōhēsī. Kangi ukugēla ukulwa ikīsu pāsī, kangi umwēne ātoligwe, pa malongo-matatu-na-fitatu.

<sup>12</sup> Lōli, o, unkulumba uyu, Gwābwīte gwāmāka uyu une nguyobelāpo, pa bukusi bwa malongo-matatu-na-fitatu, āpōnjwīle kilikyōsa iki kyāli pakīsu kangi mu—mu gehena. Pa bukusi bwa malongo-matatu-na-fitatu, unkulumba kangi ugwāmāka u Mpōnjōli!

<sup>13</sup> Une ngwīnogonēla isya mabwīte amakulumba aga galwīgwe pa ngunda. Uswe tumenye, ukumalisya nu Napoleon, ukuti umwēne ālīsīle ku bumalikisyo bwāke ku Waterloo. Ulwēne lwāli lusako lwāngu, pakaya patali mma, ukukēta pamwanya pa fya kwegelēla ifi fyātēndekīgwe ukufuma ku fibongotoke fya magileta gāke, kangi ukufuma ku banyāmbala ba bafalasi na banyāmbala, isya mūmo abēne balāmbalalīle pa ngunda gwa bwīte. Kangi amagileta gabūngēne palikimo, amagudumu gakonywīke, kulakula kangi pānja ndukubo, isya kūko ikibonekesyo ikikulumba iki kitēndekīgwe.

<sup>14</sup> Kangi ko kukīndana kuki ukwēne kuli: ukukētēsya ukuti unnyāmbāla pa malongo-matatu-na-fitatu, kangi ukukosyasoni uku kulāmbalēle pala mu kikūmbusyo kya bwīte bwāke ubukulumba kangi ukupōnjōla; kangi polelo ukubūka ku Yerusalemu, kangi kēta ilipūmba ilisitakandu, ukuya kikūmbusyo kya nkulumba kangi gwāmāka u Mpōnjōli.

<sup>15</sup> Mu njila yimo iyīngi, kilipo ikindukimo mu kupōnjōla. Linga uswe tuli nakyo ikindukimo iki uswe tukulwīla, linga yilipo imbungo mu mbili gwītu, kangi uswe tukulwa pakati pa

bufwe nu bŭmi, bo bupŏnjoli buki ubwēne bukuya akabalilo kākō uswe tukukēta ubwēne bupŏnjoligwe. Linga uswe tukulwa pamwanya pa kasumo kamo, pamo ikīndu ikilumba ikindukimo iki kukutusulumanisa uswe, akabalilo kākō kubumalikisyo indembela ingulumba sikusugania kangi uswe tupŏnwīle ikyēne; ko kwīpilika kuki ikyēne kikutupa uswe, nkati mwa uswe, kabuno uswe tubagīle ukuya mpŏnjŏli.

<sup>16</sup> Lilino une ngwinogŏna isya bwīte ubu bwākīndāga, kangi mŭmo fikuti akabalilo kākō Hitler ālyēgīle Warsaw. Kangi aba kiJeremani bīnagonāga ukuti bula bwāli bumō mwa bupŏnjŏli ubukulumba ukukīnda bōsa ubu bwābagīle ukuya, panongwa yakuti u kapitao gwābo unkulumba umwalafyāle, Adolf Hitler, akabalilo kamokene ālībīsye kilikyōsa mu Warsaw, ukulepulanania imilalo, kangi ululalo ulukulumba lulinkugwa. Ifinyuzi filikupīmba amapicha amakulumba aga kugwa kwa lulalo. Aba kiJeremani balinkukūya ukukīnda mu lukīndi, kangi abēne balinkutika ing'oma kangi balinkukuba ingufi, kangi amaelifu ga ndege galinkukīlānia pa mwēne, bo umwēne ākabile ubupŏnjŏli ubukulumba ubwākūnda. Itūgēsye pānja ngati yumo Alexander u Nkulumba, pamo u Napoleon yumo, ukupŏnjoāla i kīsu, lŏli ngimba kūgu umwēne āmalikīle? Mu bukosityasoni. Naloliloli, umwēne ābŏmbile.

<sup>17</sup> Une mbagīle ukukūmbukīla akabalilo kākō abēne bāyēngīle i Ngilanilo ya Burma ingulumba. Kukufīmbilisīgwa ukuyako. . . linga abēne bākīlénie ikyāmba. Bamo mwa balumīāna bītūgēsye apa ulubūnju ulu, lumo, aba bākīlénie pamwanya pa bukilanio ubukulumba bula. Yo mbombo nki iyēne yāli! Yo mbombo yanaloliloli nyīngi bulebule ikyēne kyālyēgīle, kangi yo mbombo iyanololiloli nki abēne bābŏmbile! Kangi syo hela silinga ubwīngi ikyēne kyālyēgīle ukuyēnga kila i Ngilanilo ya Burma, amamiliyoni ga madola! Abalumiana aba bātāgīle imyumi gyābo, mukubŏmba lūla! Lŏli kubumalikisyo, kangi bo kakīndilēpo akabalilo, akabalilo kākō imailo ya bumalikisyo iya njila yikīndīgwe, kangi akabalilo kākō ikikilanio kyāmalisīgwe, ukuti mŭmo ukuywēga kwabupŏnjŏli kwāfyūkīle mmwanya ukufuma ku bāndu! Abēne bāli nabo ubukilanilo ubu abēne bābagīle ukukīlānia ifyāmba nakyo, ukukaba ubupŏnjŏli.

<sup>18</sup> Une ngwinogona isya ingilanilo iyīngi, iyi ilisiku limo iyēne yālyēgīle ubŭmi bwa Ntwa gwītu unsayīgwa. Iyēne yikāli pēne pa nsebwe pa kīsu, lŏli iyēne yāli njila-ngulumba yikubilikīgwa “njila-ngulumba ya bwīkēmo,” kūko abafitano batīsakukilania, lŏli bēne bābo aba bŏkyīgwe. Bēne bala aba bali pa lubafu ulu Umwēne alipo, bisakukilania injila-ngulumba iyi.

<sup>19</sup> Imbŏnjŏli ingulumba isi sikabīgwe. Twe bīngi ba uswe tubagīle ukukūmbukīla kanunu isya Bwīte Bwākūnda Bwakīsukyōsa. Une ngukūmbukīla akabalilo kākō une nāli itolo ndumiana nnini, une mbagīle ukupilika ifimbyoto fikupūta; kangi bŏpe na balimi, mmigūnda, balinkwīmika

ifalasi syābo, nukuyūgānia ifitili fyābo. Abēne balinkuywēga. Abēne balinkukōlēla. Ngimba fyo fiki fyābonīke? Ubwīte bwāmalīke. Ubupōnjōli bwākābīgwe. Ubukabi ubu uswe twālwīlāga, kubumalikisyo uswe twākābīle ubupōnjōli.

<sup>20</sup> Une ngwīnogōna isya bwītu ubu bukīndile ubu. Une nitūgasyāga itolo ukukilānia ulukīndi. Kangi akabalilo kāko ingufi sikwānda ukupūta, abāndu bikubopela m'malubīngilo; abakīkūlu na ba epuroni bābo bafwēle, bikubafūla abēne, nukubasugānia abēne mmwanya. Ifipolopolo fikupululuka mfipiki. Ifimbyoto fikupūta. Amagali gikubopesania mu ngīndi. Abāndu balinkugwa pa mafūndo gābo, nukufyūsya ifiboko fyābo. Abēne balinkuywēga. Abēne balinkukūta. Fiki? Panonga yakuti ubwīte bwāmalīke. Kangi abasayigwa bala, abalumiana abapala aba bāli kwisilya kwa nyanja, lululu bikulobokelāga ku kāya kangi ku bēne. Bo bupōnjōli buki! Ko kabalilo kaki, kangi ubuhobofu ku ndumbula yiliyōsa! Yo lusekelo lwa jubili luki! Ikilo kila, aligwēsa āli mu lusekelo lwa luko, ugwe gwābagīle ukwīngila mbulyelo nukulya, nukusōka panja kangi ukāhōmbīlēpo pa kyēne, ikyēne angali kili kanunu mōsa. Ugwe gwābagīle ukuti gwābōmbīle imbombo iligāli lwa mūndu umpalamani, ikyēne āngali kili kanunu mōsa. Ugwe gwābagīle ukusūma iki ugwe gwālōndāga, kangi ugwe āngali lumo ugwe upēgīgwe ikyēne. Panongwa ya fiku? Ubupōnjōli bwākābīgwe. Abalumiana bīsāga ku kāya kāngi. Ubwēne bwāmalīke mōsa.

<sup>21</sup> Kangi une ngwinogona, unkundwe gwangu, ikyene kinyali fiyo ukuti ubwipilike bwa luko lula bukabagila ukwitugasya akabalilo kosa. Loli, ku Nkristi, ulubunju ulu, ubuponjoli bukabigwe. Amabangala gabusangulufu gikukuba. Ubwite bumalike, pakati pa Kyala nu mundu. Ubuponjoli bukabigwe.

<sup>22</sup> Bo ubuponjoli bulibosa bubagile ukukabigwa, pabagile ukuyapo untengo unywamu guhombigwe. O, gyo mitengo nki! Kangi utubalilo tumo igyene misolofu fiyo, kangi ifyene fikupela ifikoko ifikulumba, ukulepulanania mosa. Loli, ukuya ni kyamba, uswe tukufimbilisigwa ukuya ni kikoga. Bo uswe tukali ukuya nu lumu, uswe tukufimbilisigwa ukuya ni fula. Bo uswe tukali ukuya nu bwelu, uswe tukufimbilisigwa ukuya ni kilo. Bo uswe tukali ukuya nu butalusye uswe tukufimbilisigwa ukuya nu busobi, pamo ugwe angali ukamanyamo siku iki ubusobi bwāli.

<sup>23</sup> Lōli ukuti apōnjōli nukukaba ubwīte ubukulumba ulukīnda bōsa ubu bwākābīgwēmo siku, Yumo alinkusōka ukufuma ku Lwīmīko, ifyīnja fingi fiyo ifi fikīndilēpo. Kangi Umwene akāliyēgīle Mwēne uluko lwa Gwāndūmi. Umwēne akālīsīle ukuya bo mūndu unkulumba ukukīnda bosa. Lōli Umwēne āyāga pakusisimikisya ukuti ikyēne kikēgelāga indusu ni fipolopolo, na ma bomu ga atomiki, ukutola ubwīte. Umwēne alifwālīke Mwēne mu bwīyufye, ngati akāna akanini, kangi āpāpīgwe mkibaga. Bukālīpo nu buyo Bwāke bwakupāpīlīgwa,

akabalilo kâko Umwêne ikwîsa. Une ngulonda umwe ukukêta ifindu ifikîndane ifya bwîte, iki Umwêne âbômbîle imbombo.

<sup>24</sup> Lilino, uluko lwa Adamu lwâli lôsa mminyololo. Pala abêne bâli, kisita lusûbîlo, kisita Kyâla, kisita lusako, kisita kisa, kisita kalikôsa aka kabagile ukubatûla abêne. Abaludugu abakulumba, aba mabuyo ga pâsi ga aba batâgîgwe, bâbigalile abêne mu ngîsi. Yikâlipo ni njila nayimo iyakusôkéla. Akâlipo nayumo âbagile ukutûla. Nakimo kyâbagile ukubômbîgwa. Ukwêne kwâbonekâga ngati lôsa, ukutâga ukumalikano.

<sup>25</sup> Lôli u Kalyoto gwîtu, Uyu âsulwîke pâsi ukufuma ki fifigo fya Lwîmîko, ukwinamîla pâsi!

<sup>26</sup> Kabuno, pakâlipo u nnyâmbâla nayumo pa kîsu âbagile ukubômba imbombo yila. Abêne bôsa, ukuyoba bo bankîsu, mu bwâtê bumobwêne. Uswe twesa, “twâpapiḡwe mu mbibi, twâbumbigwe mbutulanongwa, ukwisa nkisu iki tukuyoba ubusyobi.” Kangi nayumo gwa uswe twâbagile ukutulâna yumo nu nnine. Uswe twâlîmîle kisitabutuli, tupônjolîgwe, bufuluganiko palipôsa, lôsa kisitabumobwene. Uswe twâtolîgwe ukukyûnga indagilo ni nyîho, ukwâga ubonywa bwâbo na fyosa bo ifyo, uswe tukâbagile ukubômba ikyêne. Kangi ikyêne kyâbonekâga ngati uluko lôsa ulwa bûndu lwâlambalikîgwe mbutâgîgwe.

<sup>27</sup> Kangi polelo Umwene âlisîle, Umwene âlisîle pasi. Panongwa yakuti, “Umwene âli ku bwandilo,” i Bângéli lyâyobîle, “Umwene âli yo Lisyu.” Umwêne âli yo Logos uyu âbûkîle ukufuma kwa Kyâla. Kangi u Logos, ku bwândîlo, âli yo Lisyu. Kangi Umwêne âlinkuya yo Lisyu. Polelo akabalilo kâko Umwêne afyûkîle mmwanya pa lisiku lya lwîmîko lîlya ilya Pâsa, Umwêne akâli itolo i Lisyu, loli Umwêne alinkutya yo Mputi Nkulumba gwa Lisyu Lyake Mwêne. O, ngimba ikindu ikyâlîwîmîko, Nkundwe Neville! Inogona itolo! Umwêne akaya itolo yo Lisyu, lôli Umwêne yo Mputi Nkulumba gwa Lisyu Lyake Mwêne. Ngimba uswe twâbagile bulebule ukwîlâmwa ikyêne? Uswe tubagîle ukubûka bulebule ku Mwêne nukusita kwîtika ukuti uswe tukwâmbilîla iki uswe twâsûmîle? Kabuno, Umwene yo Lisyu kangi u Ntugasya-pakati gwa Lisyu! U Logos alinkuya Lisyu, kangi i Lisyu lilinkutêndekîgwa ukuya mbili; kangi umbili gulagula ugu gwali Lisyu, gulinkwâmbilîlîgwa ku Lwîmîko, kangi lilino yo Mputi Nkulumba uyu ikwîmîlîla pakati, ukwisila mwa Mwene, ku Lisyu Lyâke.

<sup>28</sup> Ikyo kyo iki ikyêne kikwêga! Ikyo kyo kîndu iki i Kipânga kili nakyo. Kyo kilwîlo kiki! Kikâlîmo siku nakimokyene bo Ikyêne. Umwêne âli yo Lisyu. Kangi akabalilo kâko Umwêne ikwîsa, Umwêne apâpîgwe nkibaga. Umwêne âlisîle ukubômbela ikilwîlo kya l-u-g-a-n-o, lugano, ukupônjôla ikîsu; komma ni fipolopolo fya bâbwîte, komma ni ndusu syamakina

ni fitanki. Lōli Umwēne isile mu luko ulukīndāno. Umwēne isile mu bubūmbe bwa lugano. Umwēne āli lugano lwa Kyāla.

<sup>29</sup> Akabalilo kamo, ngati ndumiana nnini, une nālisibīle ukwinogona ukuti Kristi ālinganile une, kangi Kyāla ālimbēngile une; panongwa yakuti Kristi ālimfwilīle une, lōli Kyāla āli nako akandukamo akakulwāna na une. Lōli ndinkwīsa ukusyāgānia ukuti Kristi yo ndumbula yilayila iya Kyāla. “Kyala ākiganile fiyo ikisu, ukuti Umwēne apele u Mwanundumiana Gwake ntiga ummwagigwe, ukuti aligwesa uyu ikummwitika Umwēne angapyutigwaga mma, loli ukuya nu Būmi Bwasyēpwa.”

<sup>30</sup> Lilino Umwēne isile, ikyākwānda, ukupōnjōla. Kangi i kindu iki u mōhesi ātalīle ābīkīle nkīsu kyāli lubēngo. Kangi Umwēne isile ukupōnjola ulubēngo. Akabalilo kāko uswe tukutōla mu mabwīte gītu, na fyōsa bo ifyo, mu mabwīte ga kīsu, ikyēne akabalilo kōsa kikuleka, kingikingi, u lubēngo; panongwa yakuti, amabwīte aga luko lula yo ndugu. Lōli Kristi ikwīsa nu lugano, ukupōnjōla ulubēngāno, ukugana bābo bakabagile ukuganīgwa. Umwēne isile ni kilwīlo ikyakukīndāna. Kangi Umwēne āliyūfīye Mwēne, “apelīgwe pāsī paninipo ukukīnda a Bāndūmi,” ukukubīlwa ubufwe, nukupa ikyākwēgelēla. Kangi akabalilo kāko Umwēne āli apa pa kīsu, Umwēne alinkwenda pakati pitu.

<sup>31</sup> Umwēne āsisimikīsyē ifilwīlo Fyāke ifya bulwīle-bwīte, akabalilo kāko Umwēne ābūmbulusyāga ababine. Akabalilo kāko Umwēne ālyēgīle utusyesye utunini tuhano nu tupatu twa bswi tubili, nukulyēšya abāndu maelifu mahano, Umwēne āsisimikīsyē ukuti Umwēne āli na maka pamwanya pa atomiki yilyōsa iyi yāliko. Himma itolo fikuti Umwēne āmesisye iswe, lōli Umwēne āmesisye iswi imbīyano. Himma itolo fikuti Umwēne āmesisye ingano mu fisyesye fila, lōli Umwēne āmesisye ingano imbīyāno mu fisyesye fila. Ikyene kyābonīsyē ukuti Umwēne āli Mpōnjoli unkulumba kangī gwāmaka yula! Himma itolo fikuti Umwēne ālyēgīle amīsī ukufuma ku kisiba, lōli Umwēne āpelīle amīsī gala, bwālwa-bwa-māfilu, ukufuma ku kisiba. Umwēne āsisimikīsyē Umwēne āli na Maka ukupōnjōla. Kangi Umwēne āganīle, kangī ikilwīlo Kyāke lwāli lugāno. Lilino kētēsya.

<sup>32</sup> Polelo akabalilo kāko Umwene abōmbege ikyo, akabalilo kako Umwene ālimile pa lubafu lwa lipūmba lya Lazaro, kangī pala ālipo unnyāmbāla, afwīle, kangī asīlīgwe ku masiku mana. Bōpe na bābo bali palapala, balinkuti, “Lilino umwēne ikunūnga nukunūnga.” Imbulo yāke yalīngile nkati, ifwīngīli sya pambili syendendekaga ukusōka mwa umwēne. Kangi Yeso ālimile pala, ukuya Mponjoli gwāmāka, akabalilo kāko Umwēne āyobile kwa Marita na Mariya, akabalilo kāko Umwene ālimile pala, “Ngimba Une ngāyobile kwa umwe, ‘Linga umwe mubagile ukwītika itolo, umwe mukukētāga lwimiko lwa Kyala?’”

Umwēne āmalísísyē itolo ukuyoba (akabalilo kāko abēne bāyobile, “unkundwe gwītu afwīle,” na fyosa bo ifyo), Umwēne alinkuti, “Une ne busyuke nu Bumi! Umwēne uyu ikwītīka mwa Une, palema nalinga umwēne āfwile, pōpe isakuyāga mumi umwene. Kangi aligwēsa uyu ikuyamumi nu kwitika mwa Une, atisakufwāmo siku. Ngimba Une ngababūla umwe itolo ukuti Agasyēpwa gala, a Maka amasayigwa galāmbalēle nkati mwa Une?” Umwēne akatēndekēmo siku ubuyobelo, Umwēne ābagile ukubōmbela kilikyōsa iki Umwēne āyobile, kabuno Umwēne āli yo Mpōnjōli gwāmāka.

<sup>33</sup> Ukwitūgāsya mwa Umwēne, ukwikolēla kunyuma, akupililigwe mu mbili gwa būndu, ukuya mūndu, lōli nkati mwa mula mwālitūgēsye nakimo ikingi lōli Kyāla Mwenemaka, unkulumba kangi gwāmāka Yula. Umwēne ābagile ukupela-kāngi. Umwēne ābagile ukupēla ifīndu ifipyā. Umwēne ābagile ukuyoba, kangi iki Umwēne āsūmile kyābagile ukupīgwa akabalilo kalakala. Lōli, Umwēne āliyūfifye Mwēne, Umwēne ālikyūngīle pāsī. Umwēne ālōndāga ukupa ikyākwelēla. Umwene alōndāga ukuya luko ulutalusyi lwa Mpōnjōli, kangi Umwene āli. Lilino, Umwēne ālisisimikisye Mwene ukuya.

<sup>34</sup> Mūmo une njobile kingikingi mu ngomano syāngu, lumo ikyēne kisakubikāga ubukēti ulubūnju ulu, mu kibugutīla iki ikya bāndu, pa lubūnju ulumogi ulu ulwa Pāsa. U nkikūlu, uyu yo gwakipānga kimo iki kitikwītīka mu kwitikisya i Lilopa lya Ntwa Yeso. “Kisita koneka kwa Lilopa, kukayapo ukufyūligwa kwa mbibi.” Umwēne ālimbūlile une u Nnyāmbāla yula āli itolo nsololi, u Nnyāmbāla ununu, kangi une nālimpelile Umwēne Bukyāla. Une ndinkuti, “Umwēne āli Bukyāla. Umwēne āli Kyāla.”

Umwēne alinkuti, “Ugwe kugela ukumpela Umwēne nkulumba ukukīnda.”

<sup>35</sup> Une ndinkuti, “Gakayapo amasyo nagamo ukulīngānia ubukulumba Bwāke!” Ululimi lwa būndu lukāgāmo siku ubulīngānio!

<sup>36</sup> Ukuyoba nu nnyāmbāla yumo ilisiku limo, umwimilili ukufuma ku Washington, DC, kangi umwēne āyobile, ubukēti ubunini ku—ku fyakulya-ifilembusi kūko uswe twālibungenie palikimo, umwene alinkuti, “Nkundwe Branham, une ndi gwa Luteri ubumi bwāngu bōsa. Lōli,” umwēne alinkuti, “ilisiku limo bo une ndimo mu luyigo lwanjila-syaiyolo,” alinkuti, “Une nāfugēme pāsī ku kigēmo, kangi nālōndāga ukuya nikyakumbonekela na Kyāla.” Umwēne alinkuti, “Kangi akabalilo kāko une nāli pala pa mafundo gangu. . .” Lilino, uyu yo mwīmīlīli gwa ku Washington uyu ābōmbīle i mbombo na pāsī Pulezidenti Cooledge. Kangi akabalilo kāko umwēne “aketege mmwanya,” umwene alinkuti, “Une nākētīle i mboniboni ya Yeso.” Umwēne alinkuti, “Une mbagile ukuyoba injobelo lwele-



na-yimoyene ingindakīndāne, kisitakitabu.” Umwēne alinkuti, “Lōli une ndinkutoligwa ikulyāga ilisyu ilyakuyoba, ukufuma mu njobelo syosa sila lwēle-na-yimoyēne.” Umwēne alinkuti, “Popāpo une nafyūsīsye itolo ikiboko kyāngu, kangī Umwēne ālimbéle une yimo imbya, ukuyoba nayo.” Umwene alinkuti, “Une ngētīle itolo u Lwimiko lya kisyo Kyāke.”

<sup>37</sup> Unkíkúlu uyu ikuyoba kwa une, umwene ātile, “Nkundwe Branham, Yeso akali nayumo loli mūndu, nsololi itolo.”

Une ndinkuti, “Umwene āli Kyāla, kalúmbu gwangu.”

<sup>38</sup> Umwēne alinkuti, “Ugwe kumpela Umwēne Bukyāla, lōli Umwēne akaya mma.” Popāpo umwēne alinkuti, “Pa nsebwe ukusuluka ukubūka ku lipūmba lya Lazaro, i Bāngéli lyāyobile, ‘Umwēne ākūtīle.’”

<sup>39</sup> Nalōli, Umwēne āli yi ndumbula yulayula ya Kyāla. Umwēne ākūbilwāga mūmo uswe tukukūbilīlwa. Umwēne āli mbili bo mūmo nanūswe tuli mbili. Umwēne āpīmbīle, mu mbili Gwāke, ifinyonyow filafila ni findu ifi uswe tukubōmba. Pōpe, ukuya Likemo ilipelelesye, Umwēne alinkufimbilisīgwa ukubōmba ikyo. Umwēne ābōmbīle. Lōli une ndinkuti . . .

Umwēne alinkuti, “Umwēne ākūtīle, ikusulukila ku lipūmba lya Lazaro.”

<sup>40</sup> Une ndinkuti, “Loli, o, nkikulu, uko ko kutalusya. Umwene āli Nnyambala yula, akabalilo kako Umwene akūtāga. Lōli akabalilo kāko Umwēne ālīmīle pala, pa lubafu lwa lipūmba lila, kūko abakimyemye abafwe balāmbaléle, kūko umbili umbolano gwālāmbaléle, gukupililīgwe mōsa ni kifūnga, akabalilo kāko Umwēne alinkuti, ‘Sosyāpo ilibwe,’ Umwēne alinkukwābwa akayēngo Kāke akanini palikimo, kangī alinkuti, ‘Lazaro, sōka pānja!’ Kangī unnyambala uyu āfwīle, masiku mana, alinkwīma pa malundi gāke.”

<sup>41</sup> Ngimba ikyēne kyāli fiki? Ububole bwāménye u Mpeli gwāke. U moyo gwāménye u Fundi gwāke. Kangī u Mpōnjōli unkulumba kangī ugwamaka yula āsisimikīsye ukuti Umwēne ali na Maka ga bufwe, kangī ku gehena, kangī lipūmba.

<sup>42</sup> Nalōli, ikyēne kikunyenemusya indūmbula! Ugwe kuyoba isya kutika isahani, nukupūta imbembe? I kīsū kibagīle ukuya mu lusekelo lwa jubili ulubūnju ulu, mūmo ikyēne kikayīlāmo siku, imikōlelo ni miywēgo gya bāndu Bāke, panongwa yakuti ili lyo lisiku lyakukūmbusyo lila pāpo Umwēne āpōnjwīle undugu gwabumalikisyo, kangī ukwābula uswe twe bamminyololo ukuya bābūke.

<sup>43</sup> Ena, Umwene āli Nnyāmbāla. Uko ko kutalusya. Umwene āsisimikīsye ukuya Nnyāmbala, kangī Umwene āsisimikīsye ukuya Kyāla.

<sup>44</sup> Ikilo kimo, akabalilo kāko ingulumba, inyānja insāmbūke, uyu abilikīle amaelifu ga mabūmi . . . Lumo mwe bamo ba māma

umwe apa, ulubunju ulu, abalumiana binu bāfwile pa nyanja insāmbūke kwisilya kula, abēne lumo bāmilitwe pāsi pa mayiga nkisu iki ikya migūnda imipapate gwa bwite. Bamo mwa baganigwa binu balambalēle panja pala, lumo pāsi pa nyanja.

45 Lōli ikilo kimo akabalilo kāko Umwēne ālambalēle mu bwāto ubunini, kangī amayiga ga yigaga ukusyūngutīla pa nyānja, ngati litēla lya supa, Umwēne alinkufyūka, nukubika ikulundi Kyāke pa lwenge lwa bwāto, Umwēne alinkukēta kubwa ku Mwānya, alinkuti, “Lutēngāno.” Kangī amayiga, Umwēne alinkutim, “Batama!” Kangī inyānja iyāmaka yila yilinkutēngāna mōsa mpaka ukwēne kukālīko nulukīnya nalumo pa yēne. Nalōlilōli, Umwēne āli!

46 Ikyēne kyo kyābwānalōli ukuti Umwēne āyāga ni njala ngati Mūndu. Akabalilo kāko Umwene alinkwisa pamwanya pa kyamba kangī Umwēne āli ni njala, ukulōndēsya mu mpiki ukuti āgēmo kindukimo ikyākulya, Umwene āli Mūndu. Lōli akabalilo kāko Umwēne ālyēgile utusyesye tuhano tula nu tuswi tunini, nukulyēsya maelifu mahano, Umwēne ākīndīle u Mūndu.

47 Akabalilo kāko Umwēne āfwile ifyīnja elifu yumo na bamia lwēle na yumoywēne ifi fikīndilēpo, ilisiku bo mmayolo akīsa, apayikīgwe pa kipīngika, ukukūtīla ikīsa, “Kyāla Gwāngu, Kyāla Gwāngu, nongwa ya fiki Ugwe undāgile Une?” Umwēne āfwile ngati Mūndu. Loli ukufwana ifyīnja abamia kalongo na fihano na fili nukongelelāpo ifi fikīndilepo, ulubunju ulu, Umwēne āsisimikīsyē ukuti Umwēne āli! Umwēne āpēle ifūngilo iyabumalikīsyō iya bwamesiya Bwāke akabalilo kāko Umwēne ālatwile ingoye sya bufwe nu gehena, nukusyūka ukufuma ku lipūmba, bupōnjoli, “Une ne gwābūmi kwa bwilanabwila! Kangī, panongwa yakuti Une ndimūmi, umwe muli būmi nūmwe!”

48 Apo alipo u Mpōnjōli! Umwe mukuyoba isya kuyugānia aba epuroni nukusyūgūsya ikyēne? Abāndu bikuyoba uswe tuli batoyofu panongwa yakuti uswe tukuywēga kangī uswe tukubopabopa, kangī uswe tukulāta kangī tukukōlēla. Abēne bakīpilikāmo siku uluyigo lwa bupōnjoli bwa ku Mwānya, ukuti, “Ubwite bumalike!” U Mpōnjōli gwītu unkulumba, ugwāmāka atolīle ubupōnjōli bulibōsa! Umwēne ikwīma pamwēne, ulubunju ulu, kisitakupalamasigwa!

49 Akabalilo kāko Umwēne ikwīsa ku kīsu, abēne bikumpa Umwēne ingamu yāpāsi ukukīnda abēne babagile ukumpa Umwēne, ukuya u “mumilisi.” Abēne balinkumbilikīla Umwēne *Belezebabu*, “unsōka gwa bōhesi.” Uko ko kutalusya. Umwēne ābūkīle ku kāya aka pāsi ukukīnda fyōsa ifi filipo nkīsu, Yeriko, kangī umūndu unnini ukukīnda bōsa nkāya ābagile ukunkētēla pāsi ukunkēta Umwēne. Lōli akabalilo kāko Kyāla, ifyīnja abamia kalongo-na-fihano-na-fina ifi fikīndilēpo, alinkusyusya

Umwēne! Ikyo kyo iki u mūndu abōmbīle ku Mwēne. Lōli, ni kilwīlo kya lugaño, Umwēne āpōnjwīle u mōhēsi aligwēsa.

<sup>50</sup> Kangi Kyāla alinkumfyūsa Umwēne mmwanya fiyo, nukumpa Umwēne i Ngamu pamwanya pa ngamu yiliyōsa iyi yibilikigwēmo ku Mwanya na pāsi. Ingamu yiliyosa mu Mwanya yikufugama ku Ngamu ya “Yeso”! U Gwāndūmi aligwēsa, u mwalafyāle aligwēsa, kilikyōsa kikufugama ku Ngamu ya “Yeso”! Ululimi lulilōsa lwisakufumusya Umwēne, ilifundo lililyōsa lisakufugama ku Mwēne. Kangi Umwēne afyūkīle mmwanya fiyo, mpaka yōpe Umwēne ikufimbilisigwa ukukētela pāsi ukukēta ku Mwanya. Uyo yo Mpōnjōli gwāmāka! Uyo yo Yūyo uyu ābōmbīle ikyēne! Akabalilo kāko Umwēne ākilekīle ikīsu, ukufuma, ikilo kyammayolo uswe twāli nakyo, Umwēne āli ni fungilo sya bufwe na gahena sipayikīgwe pa lubafu Lwāke, ameni, “Ukufīla mma, Une yone Umwēne uyu āfwīle, kangi yo mūmi kangi kwa bwīlanabwila. Kangi” (*kangi* yo mōngāni) “Une ndinasyo ifūngilo sya bufwe na gahena, sipayikīgwe papapa *apa*.” Ukuyoba isya Mpōnjōli! “Kangi, panongwa yakuti Une mbōnjwīle, Une itolo nāpelile unsebwē-unywamu kuli umwe ukwēndāmo.”

<sup>51</sup> U mūndu āpīkīgwe ku Mwanya, umisebwe-iminywāmu gyaligalilīgwe. Kukālīko nagimo imisebwe-iminywāmu. Lōli, kūko kukālīko imisebwe-iminywāmu, Umwēne isili ukutēndēka gumo. O, mwe! Ulukīndi lwākwānda lwāli misyētāno gya kwīlāmwa, ulukōnge lwāli kabini, ulukōnge lwāli bwīmi; ikīsu iki kyākupililīgwe pamwanya ni ngīndi sya maka gya misyētāno; polelo ububine, imbūngo. Lōli akabalilo kāko Umwēne andaga ukufyūka ku Mwanya! Ikilo kyammayolo uswe twali nagwe Umwēne bo ikusōka ukufuma ku gahena, ni fungilo sya bufwe na gahena pa lubafu Lwāke. Ulubūnju ulu uswe tukummwega Umwene mmwanya. Haleluya! Akabalilo kāko Umwēne āsyūkīle, Umwēne āli. . . Umwēne ali bupōnjōli. Kangi, bo Umwēne āfyūkīle mmwanya, Umwēne ābongotwīle amaka ga misyētāno giligyōsa aga gikukolelēla pamwanya pa mūndu. Umwēne afyūkīle pa Mwanya, nukupa ifikūngilwa ku mūndu, ifikūngilwa fya Mbepo Mwīkemo. U Mponjoli gwāmāka! Umwene ikwīma pamwēne, ulubunju ulu! Kangi, pakati pa Mwēne nu mwitiki aligwēsa, go nsayīgwa ugwayolo unsebwē-unywāmu ugwa bwīkēmo ugu abagolofu bisakwēndāmo. Yikayapo injila ya kubopako. Lulipo lumolwēne itolo ulukīndi ukusulukila ku Lwīmīko. Umwēne ālekīle a Makato Gailopa bo Umwēne ikwēnda ukukīnda mu ngīndi sya maka ga misyētāno, nukupēla unsebwē-unywāmu kuli uswe, injila yōsa ukukīndilīla. Umwēne itūgēsye Pamwanya, ulubunju ulu, ukuya Mpōnjōli gwāmāka!

<sup>52</sup> A bāndu Bāke bikuya nu lusekelo lwa jubili. Amalongo ga maelifu ga bēne, ukusyūngutīla ikīsu, bikulāta ubupōnjōli.

<sup>53</sup> Une ngētesīsye iki ikyaiyolo ikitalalifu ikikafu ikīngila-

kipānga. Une mbagile ukwinogonela umundu yumo ikuyoba. . . Une ngubanāngisyāga umwe ikitāgilo kya ikyēne.

<sup>54</sup> Apa, bo itolo u Bwīte Bwākwānda bwāmalīke, indumi yīsāga ukusuluka unswēbwe apa, ukwīsa mu bāsi ya Greyhound. Abēne balinkuti, “Ngimba unjwēgo gōsa go fiki? Ngimba ugwēne go gwa fiki?”

<sup>55</sup> Kangi yumo mwa bēne alinkuti, “Kēta kuni, apa kilipo ikikalatasi. Ubwīte bwīmīkīgwe itolo.” Kangi aligwēsa ikulīla nukulāta.

<sup>56</sup> Lōli unkīkūlu yumo alinkuti, “O, mwe, nongwa ya fiki ubwēne bwafīmibilisīgwe ukumalika bo lula?” Alinkuti, “Linga ubwēne bwābagile ukumalika itolo amasiku manini ukōngelelāpo,” alinkuti, “Yohani na une twitūgasyāga njila imbepe.” Alinkuti, “Uswe āngali twākāli twītūgēsye pala.”

<sup>57</sup> Ālipo unnyāmbāla īmīle mu nyuma mwa buyo bwa basi; alinkunkamanda unkīkūlu yula, kangi kifuki ālinsopile unkīkūlu yula pānja pa kifigo. Kangi akabalilo kāko aba polīsi bālinkolīle unnyāmbāla yula, umwēne alinkuti, “Inongwa une mbōmbīle ikyēne,” umwēne alinkuti, “unkīkūlu yula akāli nu mūndu nayumo kwīsīlya kula uyu umwēne āfūmbīlwe nayo. Lōli une ndinabo abalumiana babili kwīsīlya kula.” Umwēne alinkuti, “Une ngābagīla ukwikola ifyakitima fyāngu.”

<sup>58</sup> O, nkundwe! Une ndinagwe u tāta kwīsīlya kula. Une ndinabo abaganīgwa kwīsīlya kula. Ikyene kyo kindukimo kwa une, akabalilo kāko Yeso āponjwīle. Une ndinagwe unkasi. Une ndinayo u mwāna. Une ndinabo abaganīgwa. Yula unkulumba, Mpōnjōli ugwāmāka! Ugwe ubagile ukumbilikila une “mwīkémō-umbunguluka” pamo u “mumilisi mwiputiputi,” kilikyōsa ugwe kulōnda. Lōli, akabalilo kāko une ngwīnogōna isya bwīte ubukulumba bula bumalisīgwe, untēngo guhōmbīgwe, ubupōnjōli bukabīgwe. Yeso āsyūkīle ukufuma ku bafwe, ifungīlo iyabumalikisyo iya bumesiya Bwāke, ukuti ubwēne bo bumalike mōsa. Umwēne yo mūmi, ulubūnju ulu, ni fūngīlo sya bufwe na gahena. Une ndinabo abaganīgwa aba bali kwīsīlya ku mpaka kula. Une ndi pa nsebwe-unywāmu unkulumba ugwaiyolo, ngufyūka mmwanya ukwakubabona abēne. Komma ukwīnogona une ndi ndemafu. O, lōli une na nhobofu fiyo ubwēne bo bōsa bumalisīgwe! Iyēne yo mbombo immalisīgwe.

Ukuyamumi, Umwēne ālinganīle une; ukufwa,  
ālimbokile une;

Ukusyiligwa, Umwēne āpimbile imbībi syangu  
kubutali;

Ukusyuka, Umwēne ālinyītikisye kisita ntengo  
syepwa:

Ilisikulimo Umwēne ikwisa—o, ilisiku ilinoge!

59 Ulusayigwa ulu ulosyo lwa Mbepo Mwikémo, ukulôngoléla uswe ukufyūka unsebwe-unywamu unswígísyé ugwaiyolo ugu, o, mūmo guyílíle Ugwēne ukwímikisigwa! Ngimba une mbagíle bulebule ukuya gwāsóni gwa Ugwēne? Une ngwīma na Mwikémo Pauli, ulubunju ulu, ukuyoba iki, “Une ngaya ni soni panongwa ya Nongwainunu ya Yeso Kristi, kabuno Iyēne yo Maka ga Kyāla ku bupoki.” Iyēne yo Maka pamwanya pa bubine. Iyēne yo Maka pamwanya pa bufwe. Iyēne yo Maka pamwanya pa lipūmba.

60 Akabalilo kāko yula unkifu, ugwaiyolo untumigwa ikwīsa kubumalikisyo bwa nsebwe gwāke, kangi abēne balinkukūmba ilipūmba lyāke panja pala, kangi ubufwe bukunkētésya umwēne nkisyo, umwēne alinkuseka mulamula mu kisyo kya ubwēne. Umwene alinkuti, “Bufwe, kali kugu ukasufi kako? Lipumba, buli kugu ubupōnjoli bwako?” Polelo umwēne alinkukōléla indufyo sya Kyāla, “Lōli ngupālisya kwa Kyāla Yūyo ikupa uswe ubupōnjōli ukwisila mwa Ntwa gwītu Yeso Kristi!”

61 U Mpōnjōli ugwāmaka ukukinda bosa aba bālimo siku nu būmi, u Mpōnjōli gwāmāka ukukīnda aba bafwīlémō siku, kabuno Umwēne āli yu mwēne Yula uyu ābagíle ukupōnjōla; ukufwa, kangi ukupōnjōla ubufwe bwēne, nukusyūka kangi mu bupōnjōli! Umwene āsisimikisye iki Umwene āli. Ikyēne kyāli kifūngilo kyabumalikisyo kya bwamesiya Bwāke.

62 Kangi lilino, mu lusako, linga alipo yumo mu nyumba iyi ulubunju ulu, uyu yo ndungufu mbuka ku kipānga, kangi akamanya ubuhofu bwa kuya nu bwīte bumalíke. Abāndu bikuywēga, abāndu bikuhoboka, abāndu bikukūta! Ugwe kuyoba, “Ngimba kitamisye fiki na bēne?” Abēne bikumanya ikyēne kyo kīndu ikimalisígwe. Ikyēne kimalike! Nalóli! Uswe tutolile aligwesa. [Nkundwe Branham ikukuba amaboko gāke—Nsimbi] Uswe tukuywēga ingangabwīte, kangi i Nongwainunu yo yikusōka panja. U lwīmíko na Maka ga Kyāla gikumanyígwa. Kangi iyēne yo mbombo immalisígwe, ulwitikāno lusainígwe; lwīmíko kwa Kyāla, Kristi abíkile i saini pa kyēne mu Lilopa Lyāke Lyēne! Ubwīte bumalíke. Ubupōnjōli bukabígwe. Une ngakabamo siku; Umwēne yo ākabile ubwēne! Une itolo ndi nhobofu isya ubwēne. Mwe!

63 Akabalilo kāko bamo mwa balumiana bala bikugomokela ukufuma kwísílya, abēne bikumbula une, akabalilo kāko i sitima yikwīsa mu New York, itolo bo iyēne yikwīsa nkiloboko, abēne bākētíle pamwanya pala kangi abēne bakibwēne i Kifwani kya Bwābúke. Kyo kīndu kyākwānda ugwe kukibona, kisōngwíke mmwanya. Abēne balinkufyūka, bamo mwa bēne bafumakubwīte balemale pala pa kipālo kwa sitima, mwakuti abēne bababíle ukukobona ikyēne. Kangi akabalilo kāko abēne bikwānda ukukibona i Kifwāni kya Bwābúke, abēne balinkwānda ukukūta. Abēne balinkulila. Abēne balinkutoligwa ukwíkola. Unnyāmba unkulumba unywāmu ālímíle pala, unnyāmbala unywāmu ugwamaboko-nakafu, ikutetema kangi

ikyuganika. Abène balinkutoligwa ukukōla ifitima fyābo. Nongwa ya fiki? Ikyēne kyāli kimanyilo kya bwābūke. Itolo kunyuma kwa Kifwāni kya Bwābūke kila, kwālambaléle... kwāli bāba, yūba, abaganigwa, unnoga-ndumbula, unkasi, umwāna, fyōsa pa kīsu iki ifi fyasanusyāga ubupala ku bēne, fyālitūgésye kunyuma ku kyēne. Kangi itolo bo bakāli ukwīngila, abēne bakyāgēnie, ikyēne kyāli kīsu kya bābūke na kāya ka bakifu. Nalōli, ikyēne kyābagile ukuyugānia ifitima fyāko, indēmbēla iyaiyolo yila yikwēléla. Inogona isya ikyēne, umfumakubwīte ugwafikoko-fyakubwīte ikwīsa nkiloboko! Nalōlilōli, akēne kāli kabalilo kanunu.

<sup>64</sup> Lōli, o, nkundwe, lumo mwa ibunju isi, akabalilo kāko iyaiyolo i Sitima ya Siyoni yikupūta, kangi une ngukubona ikimanyilo kila, i Kipīngika ikyaiyolo ikyamagengelemia! Akabalilo kāko imibelo gikutika indembela syāke imfubifu isyaiyolo, bo umwēne ikwēnda ukukīnda nkifunienie kya bufwe. Bo buponjoli buki ubwēne buli! Fiku, yo nongwa uswe tukabagila ukuyanakyo ikitima kyītu kimyemye! Ikindukimo kibonike; uswe twīsile ukuya benekaya-bināke. Ikīndu kyo kimalisigwe.

<sup>65</sup> Akabalilo kāko abēne bayēngile ululalo pakati pa Kulūlu na—na—na—na Kwītóngo kwa Australia, ukufuma ku Sidney, ukukilania Kwītóngo kwa Sydney. Mūmu unnyāmbāla aligwēsa ālyēgile... Nongwa, abēne babūkile mōsa nkīsu, ukummwāga u nnyāmbāla ukubōmba ulwēne. Imbombo yāli nywāmu fiyo, 'nongwa yakuti abēne bāyobīle nayumo ābaagile ukubōmba iyēne. Kubumalikisyo, unnyāmbāla ukufuma ku England alinkuyoba, "Une nisakubōmba imbombo." Kangi akabalilo kāko umwēne āfikile kusi kula ukwakubōmba imbombo yila, umwēne āgelile innati yiliyōsa iyi yālingile mu lulalo lula. Ubufumuke bwāke bwāli pa lugelo. Umwēne āgelile umfu guligōsa ukusyūngutīla kangi kilifyōsa iki kyālingile pāsi. Umwēne alinkufika ukusyūngutīla, kangi ifinunu ukukīnda fyōsa ifi umwēne ābagile ukufyāga; umwēne alinkubāga aba mekaniki abanunu fiyo ukukīnda bōsa, aba mikemo abanunu fiyo ukukīnda bosa, ifinunu fiyo ukukīnda ifya kilikyosa umwēne ābagile ukufyāga, ukusyūngutīla umwēne. Kangi, kubumalikisyo, akabalilo kāko ululalo lwamalisigwe, kangi ilisiku likwīsa kūko umwēne ābagile ukugeligwa.

<sup>66</sup> Abalōndésya-busobi balinkwīma kubwa ku lubafu lumolwēne, kangi abēne balinkuyoba, "Ulwēne lutisakwikasya lōsa mma. Ulwēne lwisakusenyendeka pāsi. Ikyo kyo kyānsanga fiyo pāsi pala."

<sup>67</sup> Lōli umwēne ākumbile kubutali, kubutali, kubutali, kubutali pāsi. Umwēne āli gwālusūbīlo. Umwēne āménye ukuti kilikyosa kyāgeligwe. Kangi umwēne alinkuyoba, "Une nisakukutēndēka ubwendo bwākwānda ukukilania nimwēne." Kangi bo umwēne ikwēnda ukukilania pa lulalo lula, pa nkyēni

pa mwenekaya, mu nyuma bo ulu; kang'i sitima inywāmu, kifuki ihano na yimoyene pabupipi, sikwisa ukukilania, ukusenyenda u lulalo lula. Unnyāmbala unkulumba uyu āyēngile iyēne, alinkwēnda pankyēni pa bubāmbē ubu, bo ulu, "Linga umwēne ikugwa, une ndinalo ulwēne." Lōli umwēne āli gwālusūbilo.

<sup>68</sup> Iyo yo njila u Ntwa gwītu unsayigwa ābōmbīle akabalilo kāko Umwēne āyēngile i Kipānga Kyāke! Umwēne ikugela ināti yiliyōsa, kilikyōsa iki kikwīngila mu Kyēne, kabuno Ikyēne kibagile ukuya Kisukigwe-mwilopa! Kangi yumo mwa ndondesya-busōbi ālīmīle pa lubafu, alinkuti, "Ikipāmbō kila kya bīkēmo-babūnguluka, abēne batisakufwānisa ikyēne." Lōli limo mwa masiku agalwīmiko aga! Uyu unkulumba, u Mpōnjōli ugwāmaka ikwēnda pankyēne pa uswe umwīsīyūgu, bupōnjōli! Ndeke umwēne asenyendeke, abōmbē iki umwēne ikulōnda, Umwēne isaku...Patisakuyapo na kasolo na kamokene mi kyēne, napamo, kabuno Umwēne atēndīke injila, kang'i amalisisye iyēne. Nalōli!

<sup>69</sup> Uswe tukwīnogōna mbwigāne bwa bāndu, ukwēga amīnogōno gītu pa fīndu fwa nkīsu. Lōli unko une ngubūle ugwē ikindukimo, nkūndwe, nasiku ukundeka une njege ni soni panongwa ya Nongwainunu! O, nkundwe, une ne itolo gwa njila-syaiyolo, mpāpīgwa-kabili, mpāpīgwe mwa Mbepo Mwīkēmo, ugwa Mbepo gwa Kyāla. Une nāpāpīgwe mu njila yila, ikyo kyo kyōsa iki une ndi, kang'i kyōsa iki une ngulondamo siku ukuya.

<sup>70</sup> Akabalilo kāmo, pakaya patali mma, ālipo u ndindwāna uyu ābūkīle panja ku sukulu ya koleji. Kangi umwēne āli mmogi, ndindwāna unnini. Kangi akabalilo kāko umwēne āgomokīle kukāya, umwēne ātwēle simo mwa fundo syāke syakukoleji nu mwēne.

<sup>71</sup> Kangi lumo, ulubūnju ulu, mwe bamo ba umwe mwāli ni fundo syīnu syāpānja na umwe. Lumo umwe mupīmbīle, ku kipānga, ifundo si nyīngi fiyo. Mulimōsa, sosyamo isyēne, kyo kīndu kinunu ukukīnda fyosa ifi une mmenye ukubōmba.

<sup>72</sup> Polelo undindwāna uyu, akabalilo kāko isitima yālīmīle pānja pankyēni, umwēne ātwēle u ndīndwāna unnini nu mwēne, kamo mwa utunini tula uluko lwa twālangāni, umwe mumenye, ngati u luko lwa Elvis Presley. Kangi akabalilo kāko umwēne imaga pala, umwe mumenye, ku sitima, unna āli, pānja, unkīkūlu unkāngale imile pala, ali ni fikoko mōsa, mu kisyo kyāke; panini, agūndēme ifibega; akadiresi ka masapa afwēle, akafūnga kanini pamwanya pa fibega fyāke. Kangi aka akannini akālangāni aka kāli nu mwēne, akalīndwāna akāngi, kalinkukēta pāsi, kang'i kalinkuti, "Mulimōsa, yo ywāni yula u mpelakisa, umboneke-mbībi ugwaiyolo mpelakinyansi?"

<sup>73</sup> Mulimōsa, umwe mumenye, ikyēne kilinkunkosya isoni undindwana yula fiyo, umwēne alinkuti, "Une ngammanya

mma,” ’nongwa yakuti āli itolo gwakwifyūsyā fiyo, kangī āli ni fundo nyingi fiyo isyankisu muntu gwāke. Kangī ikyēne āli mama gwāke mwēne.

<sup>74</sup> Akabalilo kāko umwēne āsulwīke pa sitima, umāma nnini unkāngale ikubopa kulakula, ukusopa ingongi syāke ukummubatila umwēne. Umwene alinkuti, “O, n’ganigwa, Kyala asaye indumbula yāko.” Kangī umwēne alinkusyūmbutusa inyuma yāke nukwānda ukusōkāko, ukufwāna ngati umwēne akālimmenye umwēne. Umwēne ākosīgwe isoni, panongwa yakuti unna gwāke āli mbībi ikisyo.

<sup>75</sup> Kangī ikyēne kyābonīke ukuya, undindila-sitima pa sitima yila, āménye akapango. Umwēne alinkwēnda ukusyūngutila pala, nukubīka amaboko gāke pa fibega fya ndīndwāna yula, ukunsyūmbutusa umwēne pankyēni pa kilūndilo, alinkuti, “Isoni pa ugwe! Isoni pa ugwe!” Alinkuyoba, “Une ngēfile akabalilo kāko u māma gwāko āli kalongo-kōsa mmogi mūmo ugwe uyīlīle.” Alinkuti, “Umwēne āli . . . Une nitūgasyāga mbupalamani.” Kangī alinkuti, “Ugwe gwāli mwāna nnini, kangī ugwe gwāli mmwanya nnyūmba mu katala kāko. Kangī u māma gwāko ānikāga imyēnda ku lubīngilo lwa kumbenu.” Kangī alinkuti, “Nakalinga itolo, pabupīyilo palinkukōla umōto, kangī inyūmba yōsa yilinkuya mu ndapi. Kangī akabalilo kāko u māma gwāko unnini ikubopa mula, kangī āménye ukuti ugwe gwa mmwanya, pamwanya pala.” Alinkuti, “Abēne balinkulāta, nukugela ukunkola umwēne. Lōli umwēne alinkugutila iki umwēne āli nafyo, ukutāga, nukubopela nkati mu ndapi sila, mmwanya mula mmwanya; nukukwāba imyēnda gyāke ukufuma mu mbili gwāke, nukukuniemba ugwe mu gwēne. Kangī apa umwēne ikwīsa, ikugomokela ukukīnda mu ndapi, akupīmbile ugwe. Kangī umwēne alinkusilika, mu lubīngilo, na ugwe mu ngongi syāke.” Kangī alinkuti, “Umwēne ālyēgīle iki angali kimponīsyē umwēne, kangī alinkukuponesya ugwe.” Kangī alinkuti, “Inongwa ugwe uli mmogi umwīsyūu, iyo yo nongwa umwēne yo mbībi. Kangī, ugwe kusanusya ukumbula une, ugwe kuyaga gwasoni panongwa ya fikoko pa mama gwāko?”

Une ngwīnogōna umwīsyūgu:

Linga Yeso ikupīmba ikipīngīka pamwene,  
Kangī ikisu kyosa kikubukaga kyābwābuke?  
Kilipo ikipīngīka kuli aligwēsa,  
Kangī kilipo ikipīngīka kuli une.

<sup>76</sup> Linga Yeso inogoneligwāga ukuya “Belezebabu,” ni kīsu iki, Umwēne āsekīgwe nukūgīlīgwa, nukupayikīgwa pa kipīngīka, āpelīgwe kyāsōni panongwa ya une, une ne gwakukīnda nhobofu ukupīmba isoni sya bwīkēmo Bwāke. Ena, nkulumba. Bilikila, “Bikemo babūnguluke!” kilikyōsa iki ugwe kulōnda, bo buyobelo bulibosa ugwe kulōnda ukutēndēka. Ikyo kitikwīmika ikyēne napanandi. Une itolo ndi nhobofu, ulubūnju ulu, ukuti,



mu ndũmbũla yāngu, u Kristi unsyũke ali nu bũmi kangi ikulagila. Une ne yumo mwa babōmbi Bāke. Une ngusũbile umwe muli, nũmwe.

<sup>77</sup> Akabalilo kĩtu kakĩndĩle lilino. Akene ko katikati isala ya buhano na bubili, akabalilo kāko uswe twāyobile uswe tukusātāga. Ingomano syakukĩndilila sikwāndāga kifuki mu sala ibili, lilino, pa sala lwēle-na-yimo- na-sinda.

Unko uswe twinamisye imitu gyitu, itolo pakabalilo mu lwĩpũto.

<sup>78</sup> Nsayigwa Tāta Gwakumwanya, amaminiti malongo mana na mahano gakĩndĩle, i Lisyu libũkĩle pānja. Indumbula syĩtu sisāngalwĩke. Ulusekelo lwa jubili lwāndilēko; komma itolo i jubili ku lisiku limolyēne, lōli i jubili kwa Syēpwa! Mu Lwĩmĩko, a Bāndũmi bikwĩmba. O Kyāla, i Kipānga, ikipōnjōli, kikwĩmba. Amabāngala ga busangalufu gikukuba. Imyoyo igi akabalilo kamo gyatobesigwe ku bufwe, nukufwa kangi nukubũka ku lipũmba lya mōhēsĩ, u mōhēsĩ apōnjoligwe! Ubufwe bupōnjoligwe. Ilipũmba lipōnjoligwe. Ububine bupōnjoligwe. Ulwĩho lupōnjoligwe. Akabini kapōnjoligwe. Ulubēngo lupōnjoligwe. Ukusitakupāsya kupōnjoligwe. Ubukafu ndumbula bupōnjoligwe. Akayĩlo-kapamwēne kapōnjoligwe. Filifyosa fipōnjoligwe. Kristi yo Mponjoli nkulumba!

Okol Kēta u Mpōnjōli Gwāmaka, (āyobile u mwātanyĩmbo)

Okol Kēta Umwēne mbonekelo ubwapabwelu,  
Kabuno Umwene yo Mpōnjōli Gwāmaka,  
Pakuti Umwēne ātāfulēnie ikikĩngo pabili.

<sup>79</sup> Umwēne ālepulēnie ikikĩngo kila iki kyāfisaga u mũndu ukufuma kwa Kyāla, kangĩ lilino Kyāla ikwitũgāsya pakati pa bāndu. Umwēne ālepulēnie ikikĩngo kila iki kyāpĩngāga ububũmbulusyo bwa Kyāla. Umwēne ālepulēnie ikikĩngo kila iki kyāpĩngāga ulusayo lwa Kyāla. Umwēne ālepulēnie ikikĩngo kila iki kyāpĩngāga ubusangalufu bwa Kyāla. Umwēne ālepulēnie ikikĩngo kila iki kyāpĩngāga ulutēngano lwa Kyāla. Umwēne ālepulēnie ikikĩngo kila pabili. Ni Lilopa Lyāke Mwēne, Umwēne ālyēndĩle ukkuya Mpōnjōli! Ubwĩte bumalike, Umwēne āsisimikĩsye ikyēne kwa uswe mu busyũke Bwāke. Kangi lilino u Mbepo Mwĩkēmo yo nkēti, atumĩgwe ukulōngolēla uswe.

<sup>80</sup> O Gwasyēpwa Kyāla, linga alipo umũndu yumo apa ulubũnju ulu, uyu itolo ikābĩsye mula, ukwĩngila nu kusōka, ukufuma pa nsebwe-nywamu, ukugwĩla pa lubafu lwa njila, akēndāmo siku kanunu pakatikati, na ba kalyoto abakulumba, aba kalyoto abakulumba aba bālyēndĩle pakatikati pa nswebwe-nywāmu, uswe tukusuma, ulubunju ulu, ukuti abene bikwĩyipāga ifyosa fyābo kwa Ugwe, kangĩ bikusōkāga

nukwikyēla ubupōnjōli ubukulumba ubu būbo bukābígwe nu Ntwa gwītu unsyūke. Tupaga ikylene, Tāta, kabuno uswe tukusuma ikylene mu Ngamu ya Kristi.

<sup>81</sup> Kangi akabalilo kako uswe twinamisye imitu gyitu pasi. Une nguswīga, mu kabalilo aka ka kabalilo, ukuti linga ugwe ubagīle ukufyūsyā ifiboko fyāko kwa Kristi, nukuyoba, “Kristi, une ngupālisya, une ndisakuyamo siku ni sōni panongwa ya Ugwe kangi mma. Une njīle itolo gwasoni panini.” Kyala akusaye ugwe, nkikulu. Kyala akusaye ugwe, nkulumba. Kyala akusaye ugwe, ugwe. O, mwe, amaboko gikubūka kulikosa! “Une njīle gwa sōni panini. Une njīle mu lukolumo lwa gwasoni. Kangi une naloliloli ngukēta ubuyo bwāngu lino. Une angali ngabōmbāmo siku kila. Une ngufīmbilisīgwa ukwīma itolo panja, ukupa ubukēti bwāngu! Une ngufīmbilisīgwa ukuya katikati ikyo. Une ngifīmbilisīgwa ukumbūla aligwēsa, ‘Une mbāpīgwe kabubili.’ Une ngufīmbilisīgwa ukumbula aligwēsa, ‘Une nāmbilīle u Mbepo Mwikēmo.’ Une ngaya ni soni panongwa ya Nongwainunu, kabuno Iyēne yo Maka ga Kyāla ku bupoki. Une ngulonda ukuya gwanalōli Nkristi gwankyēni. Une mfumile pakuya. Lōli, nu butuli bwa Kyāla, ukufuma pa lubunju lwa Pāsa ulu, une nguyaga. Une nguyaga.” Umunduyumo uyungi fyusya ikiboko kyako lilino bo uswe tukāli ukusuma? Kyāla akusaye ugwe, ugwe, ugwe.

<sup>82</sup> Mwe, keta i nyinogono! Pabunini fiyo kifuki malongo-mabili-na-mahano pamo malongo matatu, bitūgēsye nkati mwa kabugutila kanini ka bāndu aka ulubunju ulu, batēndīke ilinogono. Ukufuma ku lubunju lwa bupōnjoli ubukulumba ubu, abēne bikuyaga, ni lipyāna lwa Kyāla, bikwīmāga panja nukusita kuya ni soni panongwa ya Nongwainunu, kabuno Iyēne yo Maka ga Kyāla ku bupoki.

<sup>83</sup> O Kyāla, bo ifiboko ifi fifyukīle mmwanya, kangi ubwīmbilo bukukobelēla pāsi pa nsebwe, bo uswe tukilēnie ukufuma ku bufwe ukubuka ku Būmi, kabuno Ugwe uyobile, “Umwene uyu ikupilika a Masyu Gangu, kangi nukunyitika Une, ali nu Bumi bwabwila.” Abēne bakilēnie ukufuma ku bufwe ukubūka ku Būmi, panongwa yakuti Ugwe ulinkuya bufwe ukuti abēne babagīle ukuya Būmi, ukwisila mu busyūke Bwāko. Ugwe gwātēndekīgwe pāsipo ukukīnda a Bāndúmbi, ukusuluka ukuya mūndu, ukusōkāmo mula mu Teofani nkulumba ukufuma Kwisilia, iki kyātēndekīgwe mbili kangi kyāli ni Lilopa, nukōna i Lilopa lila, ukuti Ugwe ubagīle ukupa injila ya kubopelāmo kuli twēsa ba uswe. Polelo kikabōmbile kyene iki mma, (uswe tukubala ikyēne mu li Bāngēli), lōli Ugwe gwāsisimikīsye ikyēne, kisitakutolīgwa, ukwisila mu kusyūka ukufuma ku bafwe, kangi ukusyusya abafwe akabalilo kāko Ugwe gwāli apa pa kīsu; kikāli kyēne ikyo mma, lōli Ugwe gwāpēle, Ugwe utēndīke ikyēne ukuya busisimikisyo kabili-kosa, bo mūmo Ugwe gwābōmbile kwa Abraham; lilino, pa lubafu bwa ikyo, Ugwe gwātumile kāngi

u Mbepo Mwīkēmo ukuya nkēti. Kangi uswe tuli nako u Kuyapo Kwāke ukusayīgwa na uswe, kangi mwa uswe, kukutulōngōsya uswe mu Bwāna bōsa nu Bwēlu.

<sup>84</sup> Uswe tukupālisya Ugwe panongwa ya maboko aga gāgo gāfyūkile mmwanya ulubūnju ulu, bikuyoba, “Une lilino ngummwega Kristi ukuya gwāngu.” O Kyāla, linga abēne bakōsigwāmo siku mmīsi, ukwīmilile ubukulumba ubufwe, ubusylīgwe, kangi ubusyūke bwa Ntwa gwābo unsayīgwa, abēne baligomokelāga ku lukomano ulubunju ulu, bikutwāla imyēnda gyābo, nukwītēndekēsya ukusuluka mu kitubwi iki ikyamatalala. Pāga ikyēne, Tāta.

<sup>85</sup> Sayaga uswe. Tuswaga uswe panongwa ya ngilanio syitu. Uswe tukukupaga Ugwe ulutufyo, ukwisila mu ngulilo isi sikwīsa. Akabalilo kāko ubwīte bumalike mōsa, akabalilo kāko ilyōsi lyūmile mōsa, kangi ubusangulufu bumalike bōsa, ubwa milomo igya mfu igi, kūko uswe tukukutūfyā Ugwe na filifyōsa ifi uswe tuli nafyo, uswe twisakuyāga na masyu amapya, ubūndu ubupya, ukukutufyila Ugwe. Tuli ingilāga uswe mula pala nu busangulufu. Kabuno uswe tukusūma ikyēne mu Ngamu ya Kristi. Ameni!

<sup>86</sup> Unko uswe twīme pa malundi gītu lilino...?...Komma ukwībwa ingomano, isala ya lwēle-na-yimo-na-sinda. Būka kukāya, kalyēge ifyakulēmbusya. Gomokelāga, uswe tukugūlīla ukuya na umwe lilino. Kangi polelo ikilo iki, kumbukilāga. Une ngufīmbilisīgwa ukusōkāpo pamusi, ukwakufūnda nu kwīpūta.

<sup>87</sup> Kabuno une nguyoba kwa umwe, ukuti, Kristi ali mūmi, Umwēne akaya mfwano mma. Kangi une ngwītika, ni ndumbula yāngu yōsa, Umwēne isakuyaga munomuno nkiyūmba iki ikilo iki, ukunāngīsya ukuti Umwēne yo mūmi, ukubōmba ifīndu filafila ifi Umwēne ābōmbīle pa lubūnju lula lwa Pāsa kangi ukukīndilīla ubwendelo bwa būmi Bwāke. Linga isyo sikāya momumo umma, polelo une ndi nsololi gwa busyōbi. Une ndi nhobofu fiyo ukumanya lilino ukuti mu sala ingulumba iyangīsī iyi ukuti uswe lilino tuli nu būmi, akabalilo kāko ulusūbīlo lōsa, lukuboneka, lukīndīle; Kristi, Ibwe ilikafu uswe tubagile ukwīma, ifisu fyosa fyo misanga yākwībila. Umma ndaga.

<sup>88</sup> Akīmbo akanini, akakusātīla, aka *Ega I Ngamu Ya Yeso Na Ugwe*. Aligwēsa, palikimo lilino.

Ega i Ngamu ya Yesu na ugwe,  
Mwana wa busulumanie ni soka;  
Iyēne yīsa ubusangalufu nu . . .

<sup>89</sup> Syumbutuka itolo ukusyūngutīla, kangi nukupōnānia amaboko, kangi yoba, “Ntufye u Ntwa,” kwa mundu yumo kifuki na ugwe. (Ena, saya u Ntwa...?...) )

Lusubilo lwa kisu kangī buhofu bwa  
Kumwanya;  
Mbala i Ngamu, O, bunyafu nki!

Lusubilo lwa kisu kangu buhofu bwa  
Kumwanya.

<sup>90</sup> Lilino aligwēsa kēta itolo injila iyi? Unko uswe itolo tuntūfyē Umwēne. Unko uswe itolo fyūsyā amaboko ginu, kangu yoba, “Ndaga Ugwe, gwe Ntwa, panongwa ya kupoka umoyo gwāngu.” Umma ndaga, aligwesa!

Ndaga Ugwe, Ntwa, panongwa ya kupoka  
umoyo gwāngu,  
Ndaga Ugwe, Ntwa, pakumbululunya une;  
Ndaga Ugwe, Ntwa, pakumbapo une,  
Ubupoki Bwāko ubukulumba ubu bwīswīle  
kangu busitantengo.

<sup>91</sup> Lo lusayo nki! Ngimba umwe munganīle Umwēne? Yoba, “Ameni.” O, i. . . Kilikyōsa kimalisīgwe lilino, bāna. Kilikyōsa kimalīke, bukayāpo ubwīte kāngu mma, kukayapo ukulwāna kāngu mma, nakimo ugwe kufimbilisīgwa ukubōmba; icyēne kyo kyōsa kibōmbīgwe. Uswe tukusangaluka itolo! O, mwe! Uswe tuli bamalisīgwe, mwa Umwēne!

. . . ukwigēmekésya,  
Mbonile kangu mfisīgwe ukufuma ku  
fyākunyomosya fyōsa;  
Ukwigēmekésya, ukwigēmekésya,  
Ukwigēmekésya pa ngongi insitakumalika.  
O, bo bunyafu buki ukwēnda mu njila ya  
bwendanjila iyi,  
Ukwigēmekésya pa ngongi insitakumalika;  
O, bo bwēlu buki injila yikuya ukufuma isiku  
ukubuka isiku,  
Ukwigēmekésya pa ngongi insitakumalika.  
Ukwigēmekésya, ukwigēmekésya,  
Mbonile kangu mfisīgwe ukufuma ku  
fyākunyomosya fyōsa;  
Ukwigēmekésya, ukwigēmekésya,  
Ukwigēmekésya pa ngongi insitakumalika.

Umwe mwe mubagile, kangu muli ni fifūnga, sosya icyēne pānja.

. . . u, ukwigēmekésya,  
Mbonile kangu mfisīgwe ukufuma ku  
fyākunyomosya fyōsa;  
Ukwigēmekésya, ukwigēmekésya,  
Ukwigēmekésya pa ngongi insitakumalika.

Lilino i Bāngéli līnu!

Ukwigēmekésya, ukwigēmekésya,  
Mbonile kangu mfisīgwe ukufuma ku  
fyākunyomosya fyōsa;  
Ukwigēmekésya, ukwigēmekésya,

Ukwigēmekésya pa ngongi insitakumalika.

<sup>92</sup> Ngimba ikyēne kyo fiki? Mbonile kangi mfisígwe, mōsa, lōsa mmalísígwe, ubwíte bumalíke, ifüngilo ya bumalíkisyo yígulígwe, Umwēne afyúkile. Haleluya!

Ukwigēmekésya, ukwigēmekésya,  
Mbonile kangi mfisígwe ukufuma ku  
fyākunyomosya fyōsa;  
Ukwigēmekésya, ukwigēmekésya,  
Ukwigēmekésya pa ngongi insitakumalika.

<sup>93</sup> Lilino unko uswe twinamisye imitu gyitu pasi kubwa mufu kūko Kyala átwegiléko uswe, kūko ilisiku limo uswe twīsa kufyūka ukufuma ku mufu bwa kīsu. Kabuno, u Ntwa gwītu, atwēle ukufuma ku mufu, ābūkile ku mufu, ukutupa uswe u Mbepo Gwāke unsitakufwa, Umwēne āfyūkile ukufuma ku mufu, kangī bōsa bala aba balī mwa Umwēne, bisakufyūka nu Mwēne ilisiku limo, ku mabuyo ga basayígwa.

<sup>94</sup> Mūmo uswe twinamisye imitu gyitu pasi, une nguketa Nkundwe Smith nkati mmyitu, ulubunju ulu, u ntimi gwa Kipānga kya Kyāla; alingōlīle une ikilo iki kyākīndāga. Nkundwe Smith, ngimba ubagile itolo ukusuluka. Une nguswīga lilino, ukuti līnga Nkundwe Smith isakutusātisya ni lisyu lya lwīpúto. Bo umwe mukubopela lelo ku twāya twīnu, nukuya ni fyākulya ifyakulēmbusya. Ukugomokela ku lukomāno lwa Sukulu ya Pandūngu, kangī u lukomano lwa lōsyo, nakalīnga ukwānda pa sala ya sinda gwa lwēle-na-limo. Ngimba uswe tubagile ukwinamisya imitu gyītu, bo Nkundwe Smith ikutubalania mu lwīpúto. 🐦

57-0421S U Mpõnjòli Unkulumba Kangi Ugwāmàka  
Kitembe Kya Branham  
Jeffersonville, Indiana U.S.A.

KYANGONDE

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Ukusanania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusanania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)